

民國鄭縣志

下
冊

民國鄭縣志

下冊

周秉彝 修
劉瑞璘 纂

李紅岩 校點

鄭縣志卷之十一

政事

清

弓省機 字躍如。少負大志，不獲舉於有司。順治丙戌，以歲貢薦任虞城縣訓導。動循禮法，楷模多士。學宮圯，捐俸修葺，以故諸生之間字者日多。卒於官。邑人爲立遺愛碑。

張希載 字厚鉢。事父母以孝，善處兄弟之間。垣曲魯太守講學天中書院，載從之游，多見稱許。諸兄即世，載撫猶子，完其婚娶，無異己出。崇禎間，出粟賑饑，賴以全活。順治戊子，以學使首錄爲拔貢生，授山東青州府通判。捐俸修葺學宮，青人勒石紀之。崇儒重農，弭盜息訟，善政不可指數。有遺愛碑。

羅博 字子約。生而奇嶷，性嚴正，不苟言笑。順治丁酉舉於鄉。越二年成進士，觀吏部政。康熙七年授山西浮山令。浮故疲弊，逃亡甚衆。案牘山積，博悉心綜理。剔奸猾，除煩苛，課農訓士，風俗爲變，百姓愛戴若慈母。遭父憂，浮民數

千攀轅號泣，送至龍角烏嶺，不忍別。再遣之，乃去。服闋，補山東福山縣知縣。時吳逆倡亂，羽書絡繹，徵呼星火，博靜以持之，民無驚擾。乙卯同考鄉試，太倉王公謂曰：『福有一人當捷去，爲誰？』博曰：『必鹿廷塋也。』既而果然，人服其鑑。內遷中書舍人。遂歸。生平嘗言無他能，唯不敢欺心耳。越四年庚申，卒。

張慶發 字月湄，鴻勳之孫。弱冠舉於鄉，著有《四子文集》、《字學集要》行世。乙酉授於潛令，以能稱。本年分校棘闈，公慎自矢，所拔六士，皆宿儒後，宗伯吳、臺諫閔尤著焉。丁亥聖祖南巡，嘉其勤，賜以食。歲饑，捐穀賑粥，全活甚衆。撫軍王嘉獎之，曰：『清練兼才。』

魏鎰 字金益，明通政使右通政尚賢六世孫也。效力史館。康熙六十年議叙通判。雍正四年，授黔之威寧。甫抵任，有烏蒙之役，隨將軍哈公進剿，派公總理糧務，查追難民一百三十餘戶，捐資遣歸。以軍功授黃平州知州。建臺拱城，團練鄉勇作禦侮計，人心始安。時運糧一萬餘石，例咨部引見，奉旨仍回原任。未入黔，聞九股苗復叛，驅車前進抵鎮遠，聞報黃平失陷，署事羅君殞焉。公在鎮遠接印條，議進兵事宜。餘勞未靖，道路梗塞，乃置家口於樓上，積薪其下，戒曰：『脫有變，焚之。』單騎赴治所。流亡滿目，骸骨成邱，招撫掩瘞，備極辛勞。驛站軍裝，傾囊捐備。補永寧州知州，以疾乞歸。黔之士人賦詩贈行，重其賢而惜其去云。以上舊志

沙起賢 字文閣，號軼皆，世居東街。幼時不苟言笑，遇有談人過失者，不答

而去。甫弱冠，即有少年老成之譽。父沒，廬墓三年，啜粥飲痛。道光乙未科副榜，業師倭文端勉之曰：『一行作吏，苟能心乎君民，雖末職微員，亦可報效國家。』公就職直隸州州判，籤分湖南，告近湖北。道光二十年，任沔陽州州同。萬勝堤潰，知州請公幫辦。署距堤數十里，夫馬薪水，均行自備。查勘萬勝堤舊址，稻草填塞，移時腐朽，公曰：『此十數州縣生靈所關，何得如此草率？』遂以灰石疊砌，永遠堅固。一日由堤歸，風雨暴作舟顛簸，人皆失色，公危坐舟中若不知也。夜半至署，衣履盡濕。工竣，士民感恩，立生祠以祀之。繼任隨州州判，德安、漢陽等府經歷。丁內艱告歸。服闋，歸湖南原省，授靖州，理瑤分州。靖州與寶慶府長安營臨界，兵米向歸苗瑤運送。地處萬山之中，峰巒絕頂，崩方千仞，人力轉輸，艱苦萬狀，冬夏兩解應此役者，不死於凍，則死於渴。公捐廉平路，易羊腸爲大道，變山徑爲坦途，民稱便之。咸豐元年，髮逆石達開擁衆數十萬，聲言攻城，公督率鄉民伐木墮石，扼險拒戰。賊不得過，竄入廣西。同治五年，升補嘉禾縣知縣。嘉禾城僅六尺，廣匪李春籠等率衆數千，夜半突至城下，人民哀號如鼎沸。公率練勇出城迎敵，拿首從數十人，僞印一顆，旗幟三十餘杆，全城得無恙。賊復至，公督團奮剿，共八日，獲賊一百餘人，訊明正法。湖南巡撫謂公有膽有識，可嘉之至。當此間不容髮之際，非胸有成竹，斷難措辦。專摺入告，保以同知升補，并加運同銜。增修城垣，高加四尺，炮臺四座。百姓感德，設長生祿位祀之。以病告歸，父老子弟攀轅而送。

者三十餘里。子維屏，以知府襄辦貴州軍務，屢立戰功，積勞病故。蒙貴撫奏聞，援立功後病故例，以道員賜卹，蔭襲其子漢東主簿。

趙永清 字子定，世居朱家屯。光緒庚辰捷南宮，以即用籤分湖北，辦黃花澇厘務。以功委署長陽縣知縣。長陽民俗簡陋，士氣不振。公大招士人，勤加課程，口講手畫，拔尤特獎。朱李山中聚有黨匪數百人，焚殺劫掠，民不堪命。武營老弱僅三十餘人，恐衆寡不敵，檄縣屬民團合捕之。分爲二隊，一伏於要害，一遙爲聲援，直搗賊巢。賊開放火槍，火燃而槍無聲，賊大窘。生擒數十人，餘賊悉潰，獲僞將、僞軍師、僞兵官，立斃十餘人，縣屬悉平。賊巢穴爲飯店王姓，公囑王姓送賊酒食，賊恣意大飲，王姓秘注水於槍中，賊是以燃槍而火不發。以功擢黃岡縣知縣。黃俗杯酒聯姻而無婚書，後多蔓訟。公爲婚書程式，鄉里稱便。光緒戊子，調簾所拔，皆知名士。循資補嘉魚縣知縣。嘉魚濱江，其港口內地皆膏腴，築口則收獲，否築則淹沒。居民以捕魚爲生者，不許築口，累訟不休。公查悉情形，稟陳得害。中丞據以入奏，民遂罷爭。邑人爲公建廟，題曰『趙青天生祠』。甲午署鄖西，以丁母憂去任。起復到省，乙巳序補武昌，未蒞任而卒。庚子，公聞受知師崇文山全家殉難，悼以詩，有句云：『不惜微軀殉廟社，終留浩氣壯山河。』又云：『峻節千秋與誰共，古今前後兩文山。』著有《木筆集》一卷。

孟澐 字筱亭，世居城內鹽店後街。同治丁卯優貢，歷署汝州、太康等縣教諭。

癸酉舉人。光緒己丑進士，禮部主事。庚寅選四川奉節縣知縣。親老告近，改選湖北羅田縣知縣。辛卯署雲夢縣知縣。初下車，問民疾苦，訪得盜魁于光明、安宏萬搶掠江夏陳爲美之妻女，賣至雲夢縣一案，經前任嚴拿未破，公懸賞購線，將于光明、安宏萬拿獲到案，一面傳陳爲美之妻女當堂對質，審明確供，婦女判歸本人領回，于光明等解省重辦。上憲嘉獎有云：『如此作吏，江漢之濱可無冤民。』通飭七十餘州縣，以孟令爲率。丁內艱。服闋，赴部投供，選甘肅安化縣知縣。創辦高等小學校、工藝蠶桑實業各學校，經費不敷，捐廉補助。凡地方應辦之事，公皆以身先之。甘省新政，推公爲第一人。宣統元年卒於任，年七十有二。

任彤光 字蓉丹，世居史馬村。同治癸酉拔貢，正黃旗教習。當時八旗官學名存實去，教習虛擁皋比，候叙待遷。公恪勤供職，與衆獨異。期滿以知縣分省湖北。巡撫于蔭霖蒞鄂，痛恨貪庸，慨然有澄清吏治之思。知公廉明，與俗吏異，委權宜都縣知縣，改權穀城縣事。穀城萬山綿亘，橫目之民窟穴其中，號稱難治。公宰穀二年，教化大行。公爲政崇本抑末，除暴安良，每逢課士，以《近思錄》、《小學》等書親爲講解。著有《練勇芻言》、《義務兵勸戒歌》等篇。歲屆秋冬，加意訓練，闔縣安堵。解組後穀人立去思碑，以志不忘。卒年七十有三。

宋運貢 字牧九，世居西街。善書法，能屬文，河南學政馮文蔚器重之。光緒乙酉獲選拔，十五年補正白旗官學教習，督課有方，恩威并濟。十八年以功保知縣，

分甘肅。廿五年署寧朔縣知縣。舊有河渠，由漢迄唐，歷代挑挖。清季淤塞，居民受害。公爲治理，民利賴之。二十九年任鎮原縣事，瀕城茹水，歲久泛濫，縣民苦之。集款萬餘緡，移河固城，閱五寒暑而功竣。其舊道涸，出膏腴地萬餘畝。以功卓異，三十三年升狄道州知州。民國二年白狼竄甘，到處蹂躪。公督勇防禦，地方以安。事聞，給予六等文虎章。民國五年卒，年六十二歲。子庚蔭，法部主事，大理院書記官。

耆德

元

尹和 家貧，有姪早孤，和鞠養之，愛甚於己子。合族百口，三世同居，貨財豐盈，子孫蕃衍。泰定間旌其門。

明

金璨、金珣同懷兄弟。萬曆間，璨爲里長，輸納無所出，官府催科，撈掠無完膚。珣詣縣自代，璨復不忍，裸體相讓。署州事尹應祥壯其義，方投杖而輒止。巡道表其門曰『兄弟真愛』。

杜守縉 誼高焚券，惠普麥舟。與鄉飲七次。

孟志尹 好善樂施，保甲逋欠，代爲輸納。三與鄉飲。

弓弼周 庠生。崇禎庚辰歲歉，貧民餓死無數。周心傷之，蠲粟煮粥。順治三十年與鄉飲。

王許 孝親慈幼，睦族卹鄰。子士奇，中順治丁酉舉人。

張同德 捐金輸粟，焚券讓田，上官俱高其行。子鴻勳爲壽州守，孫抱成進士，共推爲盛德之報云。

許瑤之輸粟贍饑，海蘊、孟養重、陰景昭、劉善風、張其善、劉起漢皆捐貲修學者，奉文給冠帶，知州俱表其里。

清

郭禦城 流冠破鄭，滎陽人蔣有德被執，繫頸於樹，將殺之，禦解馬贖焉。有婦人抱嬰兒哭於山谿，禦問故，曰：『吾滎陽朱氏婦也，舉家歿於賊，惟吾子母得脫。』禦收養之。寇退，歸其家。准與鄉飲。

馮盛譽 幼失怙，事母至孝。天性仁慈，好善樂施。准介賓。

生員魏又徵，絕迹公門，閭黨稱孝。康熙二十六年介賓。

劉降雨 性至孝，每昧爽入市，取甘旨以供父母，雖垂白不改其常。父老稱孝，以雨爲首。教子愛而能勞，兩兒亦循循受命，有能文聲。康熙間公舉鄉飲。

荆陽孕 鄭庠生。母病侍湯藥，目不交睫者近三年，鄉里稱之。與同懷兄友愛甚篤，兄歿，撫其所生，誘掖提携，卒使有聲庠序。孕之族繁至千指，有相爭競者，

孕教以尊祖敬宗，舉范文正公之言以相規曰：『族有親疏，吾祖宗視之，均是子孫，固無親疏也。』族人化之，率歸於禮。康熙二十七年與鄉飲。

胡守安 康熙三十年與鄉飲耆賓。年少失怙，事母甚恭，病侍湯藥，吁天求代。母歿，哀毀骨立，扶杖乃能行。闖寇之變，負幼弟渡河朔，經營以給其食，曰：『是吾母之所愛者，妻子弗顧也。』教子更嚴，午夜篝燈談忠說孝，諸子屏息而聽，不命之不敢退。二子爲諸生，名駸駸起，猶子渤，讀書不求訓詁，古文詩詞亦能悉其梗概。鄭人稱其拾金不昧云。

李舜德 鄭庠生。事親以孝聞。應試許昌，拾遺還之，群稱有不疑之風。嚴戒子孫，不入公門。著《耕讀書》四卷，分別古人行事之得失，以爲家訓。崎確碱鹵之田，種樹各有法。子瑄嚴梓其書而傳之。康熙庚午年，與鄉飲介賓。

以上皆事迹可考者。至冉思、李東明、袁春秀、劉國善、焦國泰、薛訓、陳大海、劉志清、劉英華、張迪功、喬冲宇、王灼、王家典、弓丕周、張拱星，舊志僅存其名，今仍之，亦不刪。

弓克捷 州增廣生。孝以奉親，廉以持己，得與鄉飲。時謂允中月旦。

黃志清 字澄瀾。祖籍徽州，其父始遷鄭，遂爲鄭人。沉静好學。流寇亂作，避地河朔之姚期營。有荆老者妻以女，且令子弟從學。四年歸，入鄭庠食餼，文名日起。潛心宋人諸書，闢浮圖說，蕭然四壁，弦誦不輟。登賢書，一爲莘縣教諭，引

掖不倦，俗學以變。年九十歸，卒於家。在河北時，有舊僕已起家矣，清固不識也。其人自言所以，執役甚恭，清每嘆曰：『天下未嘗無好人。』而姓名終不以告子弟，存心忠厚如此。

魏世盛 字昌侯。庠生。天性孝友，兄弟五人，盛居長，母愛諸弟，盛順承母志，財產器具悉以美好者讓弟。平生急公事，錢糧必八月全完。戒其子弟曰：『生享太平之福，國課不可緩也。』其他施棺濟貧，善行甚多。

毛九叙 庠生。持已待人，長厚可法。子五，食餼者二。雍正五年與鄉飲介賓。

陰章 字孺文。廉謹自飭，雅好讀書，不問家人生產事，爲諸生，有名而奇於遇。乙卯舉於鄉，年已老，試禮部不售。會清帝乾隆特命舉人七十以上不第者咸引見，乃援國子監學正銜。礪節敦行，因公論事，侃侃持正，未嘗及私。居恒一廬，飯甑塵封，恬如也。內養純備，精神不衰。午夜篝燈，鉛黃甲乙不去手。乾隆乙丑，復上春官，年八十餘矣。襤被跨驢，一如少壯。蒙詔見八十以上者，特恩賜中書銜，并給內紵二端。兩邀異數，人皆榮之。

弓運昌 世居弓家砦。年七十餘，忠誠勤幹，老而不衰。家故貧，率其子弟力田傭工，出入瑣細皆受指劃。一門三世男婦六十餘人熙熙然，有薦紳所難者。

王如燦 世居荆王莊。乾隆五年歲饑，給其村民銀一兩至五兩，穀一石二石不等，三十餘家得免流移。是年四月間，本州設廠賑濟，又捐銀百兩充入粥場，撫藩

給額獎賞。初，如燦無子，晚始得之，人以爲厚德之報云。事載彰善錄。

弓泰 性醇樸。年逾八十，與胞兄友恭如孩提。雍正五年與鄉飲耆賓。

王業振 善持身，然諾不苟。年八十，鄰里公舉善人，知州張鉉旌其門曰『盛世人瑞』。

魏皋 世居魏家河。母鄭氏，年幾九十，一切家務，皋必稟而後行，罔敢自專。起居飲食，尤能曲體，以博老人之歡。和於兄弟，鄉黨共稱。開封府朱旌其門曰『孝友可風』。

劉成文 世居于家溝。與異母兄同居。其兄將所分之產，廢而他徙。嫂亡，兄窘甚。文知之，不遠百里迎兄歸，復以己產之半贍兄，又爲兄續聘，延嗣續焉。

霍福 世居郁家寨。性孝友。父歿，哭泣盡哀，典身以營窀穸，備極拮据，并不諉諸兄弟。其妻王氏割股，見孝婦志。

陳士俊 世居小店陳莊。繼母王氏雙瞽，士俊事之如親母。與兄弟居，財不私己。人有借貸，不權其息，衆感激。知州張額曰『孝友可風』。

羅名儒 字濂源。幼失怙，奉母至孝。性嗜學，中遭喪亂，避地河朔，顛沛流離，手不釋卷。順治庚子，以歲貢薦任光山訓導。光山兵燹後，人文凋敝，加意培植，捐俸葺學，訓課有方，士風丕變，光邑咸慶得師。去之日，立遺愛碑。政績載《光山縣志》。

羅緯 字綉坤。事孀母四十餘年，色養孺慕，人稱純孝。性聰敏，博通經史。弱齡游泮，或勸其進取，曰：『吾早失怙，幸侍萱堂足矣，忍離膝下，而逐浮名耶！』師範多士，德量寬洪，壽逾八旬。孫炳，以進士衍其家學云。

劉琰 鄉賢，任永寧知州。得壽五世孫。性孝友誠慤，父早亡，事母至孝。母多病，湯藥親嘗，衣不解帶，養生送死如禮。撫諸弟以友愛，教養備至。與胞叔用謙析居，俱推讓，獨取下產。老僕洎叔病故，不能成殮，琰力任之，一切棺衾，售產辦理。至今鄉黨多稱道之。

郭蒞 字秋碧。監生，候選同知。孝友慷慨。延師教子姪，妻焦氏身任執爨，俾至成人。至今嘖嘖人口，本郡學正劉褒美之。遭歉歲，孫家岡、黃岡廟等莊佃戶逋負甚多，慨然焚券，不令其償，鄉黨德之。

羅懋謙 字猷遠。郡庠生。事父母色養無違。三兄皆中年早逝，撫遺孤如己出。姪憲澤登甲辰鄉薦，子憲淞貢明經。叔恂盛暑大病，謙往侍湯藥，衣不解帶者兩月。族黨有不睦者，爲之調停。仗義恤貧，友人副貢樊潤病劇托孤，謙爲經理者八年。甥毛汝詵令宜君解組歸，貧甚，謙時周其乏。汝詵歿，謙時病亦垂危，猶遺之櫬以助喪。與人交然諾不渝。尤好接引後學，啓迪不倦。晚年作《傳家要語》三十則、《喪葬避俗格言》、《年譜》，藏於家。鄉飲大賓。

張翺 字適南。歲貢生。海鹽令如鐸之父。族兄羽，家貧無力讀書，決志農圃。

翺慨然曰：『吾張氏詩禮傳家，日用之貲，吾身任之。』遂不時周濟，又歸所當地畝，不令償價。羽得專志讀書，入學食餼，歲貢，授桐柏縣訓導。至今鄉黨稱之。舊志

李日升 字光天。生性至孝。父病數十年，侍奉如一日，宗族共稱其孝。卒年八十四歲。恩准鄉飲。

李人睦 字象熙。恩准鄉飲。

弓瞻淇 字抑戒。生而神異，無志科名，日以賦詩爲事，如『尋梅不上嶺南去，緣何騎驢到我家』之句，亦足見其一斑。卒年九十有七。例准鄉飲。

陰維新 字振業。廩生。習岐黃業，精通脉理，尤善治嬰兒痘疹，著有《痘疹金鑑》。每遇逆症，公曰：『可治。』治之立愈。州牧孫旌其門曰『升年壽世』。卒年八十有五。

康文炳 世居七里河莊。勤儉治家，忠厚待人。同堂燕禧，上數高曾；八葉綿衍，下迄雲礽。男耕女織，人無游惰。公年九十，猶理農業。知州王成德旌其門曰『壽張家政』。例准鄉飲。

李宣三 字協六。道光癸卯歲貢。性嗜學，老而彌篤。鄉闈二十餘科，志不少衰。每夜讀書，聲徹林谷。獨闢一室曰『淑性齋』。遵古尚友，食雖粗糲，晏如也。室中圖書、翰墨充溢左右。教讀務葉音律，親爲批點，嘗曰：『士不讀《小學》、

《曲禮》、《儒行》，無以爲人。』門下士多成就，視履考詳，綽然有君子風。見者無論識與不識，咸以老先生稱之。同治甲戌，年愈八旬，恩賜舉人。乙亥，恩賜翰林、國子監學正、學錄。鄉人榮之，旌其門曰『太公遇合，彭祖精神』。卒年八十有五。

陳廷俊 字掄汝。嘉慶增生。世居南街。治家遵義門規則，作家規數十餘條，訓誡子弟。咸豐年間，土匪攻鄭，公率衆守城，鬻田捐餉，給獎不受。季子以廩貢授職訓導。公年九旬，侍郎楊貽堂作文上壽有云『其書莫廢文明道，不爵而尊禮衛身』之句。河南方伯王青崖贈一匾，題曰『齡延義門』。年近百歲卒。恩准鄉飲。

閻爾須 卒年九十歲。恩賜耆老。

閻東銘 字新亭。太學生。老成忠厚，樂善好施。卒年九十二歲。例准鄉飲。

盧德 三世居南十里鋪。性沉靜，與人言生平未嘗高語。奉母孝，曲盡孺慕，鄉里賢之。卒年九十四歲。恩賜耆老。

孫廷瑞 和睦鄉鄰，待人忠厚。卒年九十二歲。恩賜耆老。

路本公 前充七里保首事，中立不倚，至公無私。清同治年間，以城工出力，保舉七品頂戴。卒年九十歲。恩准鄉飲。

王兆有 世居王許集。九品職銜。粗識文字，心性直爽，不輕然諾。辦公數十年，無瑕可議。卒年八十有九。例准鄉飲。

王廷儒 世居西徐村。准貢生。和處鄉里，與人無爭，人多感而化之。卒年八十有八。例准鄉飲。

李訓 字學古，世居沙窩李。附貢生，候選教職。品學兼優，善治鄉評。卒年九十有五。

王建 字肇基，世居州北關。和以處衆，惠以濟人，篤學不倦教。二子，振家廩生，顯家拔貢。光緒己亥卒，年八十有四。例准鄉飲。

王德昭 字懋齋，南曹人。好善嗜學，至老不倦。於南曹村外河岸修橋，以利行人。知州裘章鎬旌其門曰『心存利濟』。現年九十四歲。

程至廣 號靜翕先生。性魯直，年三十補博士弟子員，設帳授徒。教尚嚴厲，游其門者皆敬憚之，以故士多成材。禮部主事孟滢，官甘肅安化縣，有政聲。咸豐季年，粵匪攻城，城中無少長，皆登陴以守城。東北隅累年爲風沙積壓，雉堞距地數尺許，防守甚難。先生適爲該段防禦長，晝夜梭巡，目不交睫。城上人有欲竊逸者，先生命其子廷瑞持刀大呼曰：『有敢離防一綫者，手刃之。』以故人人奮勇，城賴以全。卒年八十有五。孫履中入庠。

宋敬之 字虛若。郡庠生。世居宋莊。忠厚待人，學業優長。卒年八十有二。張效渠 字問清。太學生。勤儉持家，忠厚待人。卒年百有餘歲。例准鄉飲三次。

張銳 世居界牌村。卒年一百有五歲。例准鄉飲三次。

張鷗群 卒年九十有五歲。例准鄉飲。

馬兌 卒年九十有三歲。例准鄉飲。

劉保坤 卒年九十歲。例准鄉飲。

郭生山 世居郭小砦。卒年九十六歲。例准鄉飲。

王樂山 字仲安。賦性清介。年十六入庠食餼。聞馬道泉先生倡明絕學，乃走謁於鞏，得濂洛不傳之秘，歸著《證道心說》。嘗曰：『爲學之道，須字字證心，方能寡過。』年七旬，自爲壽序，以伯玉知非，孔無大過，與門弟子相警惕。光緒三年卒，年八十有四。例准鄉飲。

王九齡 世居洪化寺。卒年九十七歲。例准鄉飲。

楊月世 居周莊。明於針法，善治痘疹。卒年九十有九。鄉里旌其門曰『香山九老』。例准三次鄉飲。

劉景侖 例貢生。世居小賀莊。卒年八十有五歲。例准鄉飲。

把鎮藩 郡庠生。世居東弓莊。好善樂施，老而不倦。鄉人爲立義行碑，侍讀學士楊少荃作文記之。卒年八十二歲。例准鄉飲。

閻宗銘 世居七里閭。卒年九十有二。例准鄉飲。

張位西 精岐黃業。年九十歲。例准鄉飲。